



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : Tir Yimiyim tiryimiyim@aolima tir yimiyim TAPAK 8

Arunachal Pradesh indang Advocate  
General Nilayananda süogo

2022 nung Philippines tir atema  
Manny Pacquiao tokteptsü

VOL. XVIII NO. 338 (ADOK 338) DIMAPUR TENTONÜ (MONDAY) RONGJUI (SEPTEMBER) 20, 2021 ₹ 5.00

## Assam CM-i NSCN-IM aser NNPGs den ajuruteptsü

**Guwahati, September 19, 2021**

(Agencies): Assam Chief Minister aser North East Democratic Alliance (NEDA) convenor Himanta Biswa Sarma-i September 21 nü Dimapur nung NSCN-IM general secretary Thuingaleng Muivah den ajuruteptsü.

Iba ajanga Naga yimjung maparen jenjang tajungba akümba ama sayur. Assam CM Sarma-isa NNPGs dena ajuruteptsü ta osang angazüker.

Assam CM aser North East Democratic Alliance (NEDA)

## COVID-19 Nagaland: 28 taneptsü angu & 24 dak putet

**Kohima, September 19, 2021**

(TYO): Nagaland nung Deobarnü nisung 24 dak COVID-19 aliba putet aser parnok züngsema nisung ajak agi 30,864 kümogo.

"Tesüiba ghonda 24 tsüingda nisung 24 dak COVID-19 putet. Parnokji Dimapur nung 13, Kohima nung 9 aser Longleng nung 2 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nung COVID-19 puteta alir nisung 28 taneptsü angu. Parnokji Kohima nung 11, Mokochung nung 9, Dimapur nung 7 aser Mon nung 1 lir" ta paisa ashi.

Nisung 30,864 rongnungi 28,780 taneptsü nguogo aser iba jagi taneptsü angur 93.24% lir" ta Dr Kikon-isa ashi.

"Tang nisung 484 anepdaludar aser parnok rongnung 88 tera shiranger, 7 kanga meshirangi oxygen agir, 14 kanga shiranga oxygen agir, 7 ventilator medeni ICU nung aser 5 ventilator agia

## Assam sorkari Dimasa Kachari yimli wazüka ayutsü

**Guwahati, September 19**

(Agencies): Assam sorkari Putu 18 buba Dimasa Kachari yimli indang senmang wazüka ayutsü aser tesüsabuba yimtiba Khaspur renlokdahtsüta ta Deobarnü Assam Chief Minister Himanta Biswa Sarma-i ashi.

Dimasa yimli tenzükang yimtibaji Dimapur liasü saka iba tesem toktsür Malibang-i belen. Malibang ya Assam kübok Dima Hasao district nung lir.

Deobarnü CM Sarma-i Khaspur semdang state sorkari ali 100 bighas (25 acres) nung Dimasa Kachari yimli indang senmang wazüka ayutsü atema mapatong ka inyaksü metetdaksü.

"Sorkari Khaspur ya tourist temi sapua semdangba tesem ka kümdakhtsüta. Department of Indigenous Faith and Culture-i iba mapa ketdangüta inyaksü" ta CM Sarma-i ashi.

convenor Sarma September 21 nü Dimapur-i arutsü.

Taoba interlocutor aser Nagaland Governor RN Ravi-i state toktsür aoba aser ano interlocutor tasen Akshaya Kumar Mishra shimba sülen iba senden amentsü ta asüba ya kanga tongtipang lir.

CM Sarma-i tang mezüing NSCN-IM aser NNPGs den ajuruteper asütsü. Taoba mapang pai Guwahati nung Naga civil society telok nungi züngsemtem den ajurutepergo.

ICU nung anepdaludar. Nisung 363 dakbo shiranga yimya kecha mali" ta paisa metetdaksü.

"Tang tashi nung COVID-19 alitsü akok ta temolung melemi bilemba sample 357,437 tendangogo. RT-PCR 107,834, TrueNat 80,966 aser Rapid Antigen Test ajanga 168,637 tendang" ta Dr Kikon-isa ashi.

"Honibarnü tashi nung nisung 676,984 nem COVID-19 vaccine indang dose 970,648 agütsüogo" ta State Immunization Officer, Dr Ritu Thurr-i ashi.

"Dose agirtemji frontline workers 60,914, healthcare workers 15,993, arishi küm 45 ser temapur 196,189 aser arishi küm 18 nungi 44 tsüingda alir 403,798 lir" ta paisa ashi.

"Vaccine agirtem rongnungi nisung 293,754-i dose anaprong agiogo. Parnokji frontline workers 46,804, healthcare workers 13,170, arishi küm 45 ser temapur 126,592 aser arishi küm 18 nungi 44 tsüingda alir 107,188 lir" ta Dr Thurr-isa metetdaksü.

State sorkarisa Barman Dimasa Kachari Development Council tashi itdakhtsüta atema mapa inyaksü, ta paisa shisem.

Tanü Sarma-i Khaspur nung Dimasa Kachari yimli indang nüngshilung aika repranga senzü.

Assam CM-isa Silchar Circuit House nung Dimasa Kachari chuba tatembuba Gobinda Chandra Narayana Hasnu indang kürakyanglu ka sayatsü.

Iba ya Barman Dimasa Kachari Development Council ajanga yangluba liasü.

Koch chubar kibong aser Dimasa yimsüsürtem tsüingda kibalembuba ajanga Dimasa Kachari yimli ya Putu 18 buba nung kümtet.

1830 nung Gobinda Chandra Narayana Hasnu-i yimsüsüba anenba sülen British nung yimsüsüba kübok iba yimli anioka liasü.

## Punjab nung Chief Minister inyaksü atema Charanjit Channi shim

**Chandigarh, September 19, 2021**

(Agencies): Punjab nung Dalit lennir aser Congress MLA Charanjit Singh Channi-i Chief Minister inyaksü shimogo. Pai Captain Amarinder Singh-i toktsüba mapa melenzüktsü.

Hombarnep 11:00 ako nung tezüngzükteper agitsü ta tanü Raj Bhawan nungi aludang Charanjit-i osangbener dang ashi.

Tesüiba ghonda 24 tashi Punjab nung taruba Chief Minister shiba shimtsü ta jembitepa aruba sülen Deobarnü Charanjit Channi-i Congress Legislature Party leader inyaksü shima liasü.

Pai tanü Raj Bhawan-i oa Governor Banwarilal Purohit den ajuruteper.

Punjab nung Chief Minister inyaksü nübo shimtsü atema Congress party general secretary-in-charge Harish Rawat aser Central observer ana-Ajay Maken o Harish Chaudhary nungeri Chief Minister inyaknür PPCC president Navjot Singh Sidhu aser Cabinet Sukhjinder Singh Randhawa na dena lennir balala den ajuruteper senden amen.

Arishi küm 58 tain Charanjit Channi ya Chamkaur Sahib nungi kümsük asemen tashi MLA ka lir. Pai Technical Education Minister teinyakdak nung Chief



Charanjit Singh Channi

Minister inyaksü shim.

Pa ya Punjab nung mezüingbuba Dalit Chief Minister asütsü aser sangküm assembly election nung rangloker pa shim asütsü akok ta bilemer, kechiyong Punjab nütsüing yongsük nung Dalit nung 31% shi lir.

Punjab nung Akali Dal-i Dalit nung vote angutsü mechi nung Mayawati'er Bahujan Samaj Party (BSP) den tesentaktep yangluogo aser iba den tokteptsü atema Congress-i Charanjit Channi shim ama bilemer.

Channi shimba osang mesangdongdang Chief Minister inyaksü atema Minister Sukhjinder Randhawa shimtsü akok ta jembia liasü.

Amarinder Singh-ia Chief Minister tasen nem tenüingsang

agütsüogo.

"Charanjit Singh Channi dangi salem abener. Pai arrtsülen aliba Punjab state aser nübortem kümzüka ayutsü imlar" ta Amarinder-i ashi.

Congress lennir Rahul Gandhi-ia Channi nem tenüingsang agütsüogo aser party-i Punjab nung dang nangzüka aliba mapatem inyaksü nenshia metetdaksü.

Taoba chief minister Amarinder Singh aser Congress MLA Navjot Sidhu na tsüingda mangatettep adoker ita aika toktepa aru. Hokolbarnü Congress MLA tem senden ka amendang Amarinder melentsü telemteba agia liasü.

Iba senden nung MLA 80 nungi 50 shi kati Sonia Gandhi dang chief minister Amarinder melentsü atema shidi ka zülü ta osang angazüker.

"Ni asemen tashi Congress lennirtemi maaksüdahtsüogo. Ni linük tenüing nung mapa toktsür aser Navjot Sidhu tenüing benokra ni anema noktaksü" ta Amarinder-i Sonia dangi shidi ka zülü.

Amarinder Singh aser Navjot Sidhu na raratepba ya 2017 election nungi tenzük. Iba mapang Sidhu-i Deputy Chief Minister inyaksü imlaa liasü saka Amarinder-i ibaji magütsü.

## India sepaitemi tiyazü osang prokba anentsüla: WC, NNPGs

**Dimapur, September 19, 2021**

(TYO): GPRN/NSCN-i Myanmar nungi prangpong-injang bener arur ta Indian intelligence agencies-i kuli kecha mali ser tai tongloktüba magizüker ta Naga National Political Groups (NNPGs) indang Working Committee (WC)-i metetdaksü.

Indo-Naga yimjung maparen nung timtem bentsür arutsü atema Indian agencies-i iba amai tiyazü otsü yanglua prokshir, ta parnok i ashi.

"Myanmar nung Naga nungertem Burmese mitkartem ket nung timtem-tuoshi jenti ajurur. February 2021 nung sorkar atsüingdokba sülen tai maketba civilian tem apuba aser tepsetba manener. Naga nung meyrjang aikati pei talidak toktsür India tsütsü Naga nung

ali nung jenoka lir. Anungji külem adianutemi iba amai tia ka ajurudang yaritsü atema WC-i shinga dang nungia temelaba magitsü" ta Media Cell, WC, NNPGs sangdong ka nung ashi.

Burma nung Naga nungertem achiajem mengui aser tashidak balala agi taküm mesamadakhtsütsü. Onoki parnok i nungdakba first aid, chiyungtsü, aben-süoshi aser tanga teyari balala maneni agütsütsü. Indian military agencies-i osang tiyazü adokba prokshiaka onoki ozü nübortem maneni yaritsü aser iba temetenji onok ket nung lir, ta parnokisa metetdaksü.

India sepaitemi Naga National workers tejentem ki mita aoba atema maparen atema süoki ia bilemer. Hopta ana tsüingda parnok i Lt. Col. Ngukato

(NSCN/GPRN-Khango/Isak)'er ki pezüben mita ogo aser September ita nung dang Khekato Kilonser (NSCN-R)'er pezüben tashi mitogo. Anogoshia sepaitemi kuli kecha melii Naga nüjiso atema inyakterem ki mita arur, ta WC, NNPGs-isa ashi.

India sepaitemi India sorkar aser Naga nung tsüingda 'Agreed Position' nung sign süa aliba angatetsüla aser akhümtsübuttsüla, ta parnokisa ashi.

CFMG Chairman-i military commanders dang yimten olemteper indang jenjang metetdaksütsüla. Iba ajanga India Prime Minister aser Home Minister nati Indo-Naga teblemstü angateta mapa inyakba ama mitkartemi maparen inyaksü, ta Media Cell sangdong nungsa metetdaksü.

## NE nung yimtenren mangatettep adokdakji Tripura lir

**Agartala, September 19, 2021**

(Agencies): Northeast state tem rongnung Tripura nung political party tem tsüingda mepetmesü teimba adoker.

Yaküm Tripura nung nisung lakh ka shia ozüing alema atalokbaji 0.5% liasü, ta National Crime Records Bureau (NCRB) report - Crime in India 2020 ajanga ashir.

Tripura sülen Arunachal Pradesh aser tasembuba nung

Manipur lir.

Tripura, Arunachal Pradesh aser Manipur dak alaka tanüingba NE state tem nung yimtenren tsütsü mangatettep raratepba ka dang maliasü, ta NCRB report nungsa shia lir.

Tripura nung yaküm yimtenren tsütsü mangatettep adokba raraba ken o 22 benoka liasü. Külen, Arunachal Pradesh aser Manipur nung kaka atalok.

2020 küm Assam nung kin o

kin aser tamangba tsütsü mangatettep adokba ken 17 benok.

Northeast nung nisung tepsetba ken o tem-a Assam nung teimba liasü. Yaküm Assam nung nisung 1131 tepset.

Assam sülen Tripura nung nisung 114 tepset, Meghalaya nung 79, Manipur nung 46, Arunachal Pradesh nung 45, Mizoram nung 28, Nagaland nung 25 aser Sikkim nung 11 tepset.

## AIM Nagaland Chapter-i 'compulsory vaccination' anema rally agi



**Awaken India Movement (Nagaland Chapter) ajanga September 18, 2021 nü longkak aita yangi noksa nung angur. (Kohima Sept. 18, 2021)**

**Kohima, Rongjui/Sept. 19 (TYO):** Sorkar mapa inyaker ajunga COVID-19 mozü agitsü state sorkari totuyuba agütsüba anema Awaken India Movement (Nagaland Chapter) ajanga September 18, 2021 nü longkak aita liasü. Longkak aiterem placards amer Old MLA Hostel Junction, Kohima nung adenshia liasü.

AIM indang odongtar aser New Life Church, Kohima nung Senior Pastor Azahto Naga-i ashiba agi, COVID-19 lockdown aser vaccine yanglua amshi tenzükba ajanga Naga nunger tetsübu-tatenten nung lir mesük.

Naga nunger nokinketer ajunga, shirnoki akhi mapang tekolak bushiba indang asükuma liasü, parnok ajak ajungbena tenarong tajak, temeli tatsük, tenük tapok aser lematar kumogo.

"Ajüsüka rongsen aser tashi arishiba aser pei agitsü kisüing bilemba nungbo asen Naga nunger ya molusongzü ama tasü tait, aser kodang ochi aser asen temeden asoshi nokdaksüsa arudir, jenshia aoba nung alima otsü yanglur kaka lir," ta pai

ashi. Iba movement ya COVID-19 mozü agiba anema mesüra mozü agir alir anema masü, saka sorkari tashiyim agi ajak agidaksütsü ozüing yangluba anema lir," ta Azahto Naga-i ashi.

"Yamai tashiyim amshiba ya asen temeden nung kongshir aser asenok alener ama angatetsüla," ta pai ashi.

Nisung ajak vaccine agidaksüba aser mask agidaksüba kisüing masü, lockdown ajanga nüburtem libaliru nunga kanga mejungi kongshir, anungji asenok akhi yimya ama alitsü mapang tongogo, kechiaser ibaji asen fundamental right lir, ta pai ashi.

Longkak aita indang kuli rateta ashiba mapang, Coronavirus ya tang tashi pasasa/mapang shia aruba yimra ka asü nisungi yangluba virus ar memetet nüburtem mangmangtepa lir, ta Naga-i ashi.

"Kechiba alima nung lenirtem aser sorkari virus indang ochiba temai madoktsür?" ta pai asüingdang.

Iba rally nung tziüing-ozüing

tsütsü nungi advocate Neiteo Koza-ia jembia liasü. Nisung ajak mozü agitsü aser tendangtsü ya tanü tashi Nagaland nung lir, koba agi Self-Determination, Right to Life aser Personal Liberty atema nüburtem temeden agiener, ta pai ashi.

Item sentong yagi nübur dak kongshir, aser parnok ola madoki tim atemer. Makamaiter temi tali tejangjaba meteter, ta pai ashi.

Mozü magiba mechi ita nung sen meyirijang asem nungi pongu tsüingta angurtem sen timba COVID tendangba nung indoker, ta pai ashi.

India ama democratic lima ka nung nüburtem temeden wazüka ayutsü aser ozüing amshitsü atema sentong yanglurtem Constitution talenba lir, anungji nüburtem temeden agientsü ya tim masü, ta ashi.

"State nung tang amshiba sentongtem ya tashi mait/maka maiter bendanga amshiba, tim masüba aser constitution agi memelaba lir, aser ibaji ajanga nüburtem temeden nung aibelener," ta Koza-i ashi.

## State nung Assam Rifles temi sentong balala ayongzüka agi



**Dimapur, Rongjui/Sept. 19 (TYO):** HQ IGAR (North) kübok Assam Rifles, Ghaspani Battalion ajanga September 18, 2021 nü Dimapur district kübok Nihekhu, Zubza aser Kukidolong yimtsüingtem nung "Today's Youth Tomorrow's Future" omen nung ajemdaker shisaliok indang lecture agütsüba sentong ka agia liasü.

Kaketshir nem shisalok ya kanga tongtipang süa agizükdaksütsü nükjidong nung iba sentong ya ayongzüka liasü, kong kaketshir 54 dena liasü.

Iba sentong ya social

distancing yimyatem amshia agi.

HQ IGAR (North) kübok Assam Rifles, Kiphire Battalion ajanga September 19, 2021 nü Kiphire district kübok Sangtsunger yimtsüing nung alirtem atema medical camp cum COVID awareness sentong ka ayongzüka agi.

Kiphire district kübok Yimkhiung kin aliba Sangtsunger yimtsüing nung medical facility densema nüingdakba facility agi anünga lir. Meta talang nung aliba nüburtem nem teyari agütsütsü

aser kasa mapang tesendaktep tajung yanglutsü nükjidong nung iba medical camp ya ayongzüka liasü.

Iba medical camp nung yimdaklir tetsür 10 aser tebur 19 teyari agia liasü. Nüburtem atema Assam Rifles temi iba ama mapa tajung inyakba atema yimtsüing nung tebu-teti, GB, Council chairman aser pastor temi pelaba lemsatepa liasü.

Maneni HQ IGAR (North) kübok Assam Rifles, Kohima Battalion ajanga Kripa Foundation, Kohima den lungjemer Substance Abuse indang awareness seminar ka September 19, 2021 nü Kohima district kübok Chakabama nung ayongzüka liasü.

Iba seminar nung shilem ka ama temesepba mozü aser yi ajanga nisung temang nung timtem agütsüba indang Kripa Foundation nungi shisalen sayurtemi jembia liasü.

Iba awareness sentong nung tetsür trok densema nisung 22 arua dena liasü

## Dimapur nung 'Trade & Export' ajungketba sentong ka agitsü

**Dimapur, Rongjui/Sept. 19 (TYO):** State nung agri aser horticulture, renema aliba chiyongtsütem, handloom & handicraft aser bendang leni yoktsü akokba osettem atema shishilempaba aser yokyayokchiba ajungkettsü aser ajungmesotsü atema "VANIJYA UTSAV" sentong Urban Haat, Dimapur nung September 21-22, 2021 anogotem agitsü.

Rongsenketzüing indaksütsü aser bendangleni yoktetsüba osettem alima dang sayutsü atema iba sentong ya India nunger nüjiso ngur küm 75 ajungba benjongmung "Azadi Ka Amrit Mohatsav" nung shilem ka ama ayongzüker alitsü.

Iba sentong ya Department of Industries and Commerce, Government of Nagaland den Ministry of Commerce & Industry, GoI, Agricultural and Export Products Development Authority of India (APEDA) aser Directorate General of Foreign Trade (DGFT) lungjemer ayongzütsü.

Iba sentong tenzüksüba nung Advisor, Industries & Commerce, Labour & Employment and Skill Development & Entrepreneurship, Imnatiba Jamir arua moatsütsü.

Sentong nung state nungi exhibitor temi state nung yangluba osettsüset balala sayatsü.

Iba Expo nung Central/State Government Department tem, Export Promotion Councils, Export Import Bank aser tejangja entrepreneurs nungi shisalen sayur aser tejembirtemi bendanglen osettsüset bener oa ayoktsü lenmangtem, teyari agütsüba aser entrepreneurs tem temaba jenjangi ajungkettsü lenmangtem sayutsü.

State/District balala nungi iba sentong nung tsüingtem arua medentetsü asünung, iba sentong ya online nung Live Stream asütsü.

Anungji iba online sentong nung adentsü jangrartemi <https://youtube.com/channel/UCa6Jv0twDP3uOoFMHTRNfHA> ajanga shilem agitetsü.

## Clark Journal of Theology tasen ka sayaago



**Clark Journal of Theology kaket sayaba mapang iba kaket zülur tasenba Dr. Toshitemjen Aier den Rev. Dr. A. Temjen Jamir, Principal aser Prof. Toshi Jamir nungertem tangokba noksa ka yangi angur.**

**Dimapur, Rongjui/Sept. 19 (TYO):** Holistic Engagement omen nung Clark Journal of Theology kaket ka September 19, 2021 nü Clark Multi-Court, Clark Theological College nung Sunday Community Worship Service alidang Clark Theological College indang Principal, Rev. Dr. A. Temjen Jamir-i sayaja liasü.

Tang adokba Journal Volume XI. No. 1 nungya shisatsü anguba article tenet aser kaket ana asadangba lir. Iba Journal zülusang Prof. L. Imsutoshi Jamir-i sentong nung jembiba mapang Principal, Dr. A. Temjen Jamir aser editorial committee aser faculty züingsemtemi yariba atema

pelaba lemsatepa liasü.

Principal, Dr. A. Temjen Jamir ya Clark Journal of Theology nung Consulting editor lir aser iba Journal zülur mezüingbuba liasü.

Prof. L. Imsutoshi Jamir-i iba Journal indang yim-o zülur tasenba, Dr. Toshitemjen Aier den tepela lemsatep aser Journal zülutsü nübu tajungba shimogo, ta ashi.

Iba kaket azünger züina akumba ajanga iba kaket copy 500 adoka aliba tan adok nungi copy 600 adoker, ta pai ashi.

Iba Journal azüingertem ya kaket shisatsü bushirtem, library subscription aser academic journal exchange lalitsü, ta paisa ashi.

## 2 buba Nagaland handmade jewellery exhibition agitsü

**Kohima, Rongjui/Sept. 19 (TYO):** Küm ka sülen 2 buba Nagaland handmade jewellery exhibition sentong ya September 24, 2021 nü The Heritage, Kohima nung agitsü.

Iba jewellery exhibition ya arishi küm 20 tain certified jeweler aser jewellery brand 'PIPO' kibur, Thungchibemo Ezung ajanga animesor tenzükba lir.

"Tan iba sentong ya United

Nations ajanga ayongzüka Sustainable Development Goals (SDGs) nung rangloker alitsü. State sorkaria tawa SDG nükla sayaago. SDGs indang nükjidong tongtipangtiba asem - No poverty (nükjidong 1), Gender equality (nükjidong 3) aser decent work and economic work (nükjidong 8)," ta Ezung-i ashi.

Iba sentong nung state sorkar indang Task Force for Music and Arts (TaFMA) densema lir.

## Arunachal Pradesh indang Advocate General Nilayananda süogo



Nilayananda Dutta (File photo)

**Guwahati, September 19, 2021 (Agencies):** Arunachal Pradesh indang Advocate General, Nilayananda Dutta, shiba dang temeimertemi Nilay Dutta ta nungja agütsü pa Deobarnü anepdang 2:30 ako meta akümüli nungi pilaogo.

Karnataka kübok Coorg tesem nung Nilay temolungjang agi mapa meinyaki akümba sülen asü. Pa arishi küm 71 liasü.

Hokolbarnü Nilay Dutta-i pa kinungtsü tena kibong kümer küm 46 buba ajungba benjongmung munga liasü.

Iba anogo (Hokolbarnü), Twitter ajanga Nilay-i iba benjongmung amungba aser noksa lemsatepba mapang aonung 10:08 ako meta, Nilay Dutta-i, "Kibong kümer küm 46buba anogomung nung, kinungtsü küna küm 52 tashi meimtepa aruba bilemtet," ta ashi.

Twitter ajanga, Nilay-isa marriage anniversary indang noksatem lemsatepa liasü.

Osang ajanga angazükba agi, teko nung tashitsü atuba aser temang nung timtem adokba sülen, anepdang 2.30 meta Advocate Dutta mozüki

anir ao, kong mozüki nung pa taküm mekümükteti süadok.

Nilay Dutta-i pa kinungtsü, jala aser jabaso toktsür süogo.

Senior advocate Dutta ya Assam Cricket Association indang taoba president liasü. Dutta ya Guwahati nungi lir aser pai international cricket umpire inyaka liasü.

Nilay Dutta asüba osang angashia, Arunachal Pradesh chief minister Pema Khandu, Assam chief minister Himanta Biswa Sarma, senior advocate tem aser tangar aikati asükhu lemsatepogo.

"Arunachal indang Advocate General, Shri Nilayananda Dutta Ji asüba osang angashia jashiseter," ta Twitter ajanga Khandu-i lemsatep.

"Pa iba akümüli nungi pila aoba ajanga, Northeast nung Advocate General takotet ka asenok den mali kümogo. Asür Dutta-i toktsür aoba kibong züngsemtem den mangyim jashi lemsateper aser pa tanela tesünep nung anisüngzükanma ta sarasademtsür," ta Khandu-i shisem.

Assam chief minister Himanta Biswa Sarma-i

asükhu lemsatepba mapang, Dutta asüba ajanga Assam nung lawyer tajung ka samaogo, ta ashi.

"Assam nung lawyer tajung Nilay Dutta mali kümogo, shibai sports administration densema wadang tanga aika nung shilem tajung agiogo. Pa süadokba ajanga kecha agia menembangtetsüsa tawa tulu ka adokdaksüogo. Pai toktsür aoba adianu aser pa asoshi mangyimer ajak dang asükhu lemsateper," ta Twitter nung Sarma-i lemsatep.

Assam indang Advocate General, Devajit Saikia-ia Dutta asüba osang angashia mangyim jashi lemsatepogo.

"Kanga dang taoksatsü aser tejashitsü osang ka. Wadang nung takotet ka, Arunachal Pradesh indang Advocate General, Senior Advocate, Former President, Assam Cricket Association aser International Cricket Umpire Nilayananda Dutta, shiba dang ajaki "Nilayda" ta nungja agütsü, yakongnung (Friday) wedding anniversary munger sülen, Coorg nung anepdang 2 ako meta ajungbena iba akümüli nungi pilaogo," ta Facebook nung Advocate General Devajit Saikia-i lemsatep.

"Law aser saisapong tsütsü tongtibang nübu ka asenok nungi pilaogo. Pa ama tesayur tajung ka nem akhüm agütsür, shiba law tsütsü rajema aliba aser yamaji mapa nunga nendaka inyak. Nübu tajung ka süadokba yong aoksar aser temolung züreper. Pa tanela teti tatem maka anisüngzükdakjangma," ta Saikia-i shisem.

Maneni, kasa sangdong ajanga angazükba agi, Covid-19 dak sendakba temzüng takang aliba yong, Dutta mang ya pa talidaki (Guwahati) bener maotsü aser Bengaluru nung aremtsü.

Secretary tanabuba asütsü. Taoba Chief Minister Dasaratha Deb-i iba mapa inyakba sülen tang Chaudhury shimogo.

Tripura nung taoba Chief Minister Nripen Chakraborty den külemi Chaudhury-i Left maparen nung tongti shilem agia liasü.

1981 küm Chaudhury ya CPI-M züngsem aküm aser Manik Sarkar-i aniba Left Front sorkar nung küm aika Forest, Information aser Cultural Affairs & Tribal Welfare Minister inyakogo.

Chaudhury ya taoba mapang Lok Sabha nunga CPI-M indang Chief Whip ama inyaka liasü aser Adivasi Adhikar Rashtriya Manch nung National Convener teinyakdak lir. Maneni Tripura Rajya Upajati Ganamukti Parishad nunga pa President lir.

## Barak Valley nung secretariat atema Assam sorkari crore 116 agütsü



Assam chief minister Himanta Biswa Sarma Barak Valley semdang tangokba noksa nung angur.

**Silchar, September 19, 2021**

(Agencies): Silchar kübok Barak Valley nung mini secretariat ka yanglutsü atema Assam sorkari sen crore 116 agütsüogo.

Honibarnü Silchar nung iba secretariat building yangluba tesem semdang sülen Assam chief minister Himanta Biswa Sarma-i iba osang metetdakja liasü.

Iba secretariat building indang kisüjensü maparen reprangshima aser asadangshir sülen CM Sarma-i ashiba agi "küm asem tsüngda Silchar nung iba mini secretariat building nung maparen inyak tenzütsü."

CM Sarma-i anogo ana atema Barak Valley semdanga liasü.

Silchar nung iba mini secretariat building maparen takok ngua renemra, iba lenden nung district asem - Cachar, Hailakandi aser Karimganj nung alirtem kanga anisüngzütsü.

Iba mini secretariat renemer sülen item district nung alir nüburtemi official maparen atema Guwahati aotsü menüngdak.

Deobarnü CM Sarma-i, Silchar Circuit House nung Dimasa Kachari Chuba tatembuba - Gobinda Chandra Narayana Hasnu indang kürakyanglu ka semzüka liasü.

"Lennir tajung ka shibai Dimasa Kachari yimli kümzüka ayu, ni pa nem akhüm tetushi agütsür aser pa temoatsü meshir," ta CM Sarma-i ashi.

## Tripura state secretary inyaksü atema CPI-M-i Jitendra Chaudhury shim



Jitendra Chaudhury (File photo)

**Guwahati, September 19, 2021 (Agencies):** Deobarnü CPI-M-i Tripura state Secretary inyaksü atema lisopur lennir Jitendra Chaudhury shimogo.

Brihostibarnü party secretary Gautam Das Covid-19 ajanga asüba sülen pa shim.

Deobarnü online ajanga state committee senden amendang taoba minister aser MP Chaudhury nem CPI-M state Secretary inyaksü molungsoa shim ta osang ajanga ashi.

Arishi küm 63 tain Chaudhury ya Tripura nung lisopurtem rongnungi CPI-M



Longding District kübok Zebo Colony nung sepaitemi mozü shibelener ka apu. Osang tejangja angazükba nung ajemdaker parnoki mita aodang iba nisung ket nung Rs 50,000 jenjang brown sugar aser Rs 83,000 bena alia apu. (Longding, September 19)

## AR-i Senapati nung KCP telungpur ka apu

**Imphal, September 19, 2021**

(Agencies): Manipur nung Assam Rifles-i Kangleipak Communist Party (KCP) züngsem ka puogo.

Assam Rifles-i KCP telungpur aputsü asoshi Hokolbarnü mapa inyak, ta AR indang official Twitter nung KCP züngsem indang noksa den osang lemsatep.

Assam Rifles indang Maram Battalion ajanga iba mapa takok ngua inyak. Osang tejangja ka nung ajemdaker parnoki pa mita ao, ta AR-isa ashi.

Osang tejangja ka nung

ajemdaker September 17, 2021 nü Assam Rifles indang Maram Battalion-i Maram Bazar, Senapati District nung KCP telungpur ka apu, ta Twitter ajanga Assam Rifles-i lemsatep.

Tzüng ozüing agi melaba ama mera tapet agitsü asoshi KCP telungpur ya Senapati Police nem agütsüogo.

Manipur nung Kangleipak Communist Party (KCP) ya nokdangba yimtenren telok ka lir. Taoba mapang Manipur State tenüing 'Kangleipak' amer iba telok tentet.



## TIR YIMYIM YIMOBILEM (EDITORIAL)

DIMAPUR TENTONÜ, RONGJUI (SEPTEMBER) 20, 2021

### Yimten ken o jembishi tenzüker

**T**ang yabo Naga yimten tebilemstü ken o ya tatem küma lateter alitsüba ser nung, India government tenüng nung jembir, Wb.R.N.Ravi o NSCN-IM na tsüngda ken o tangatetep kati marutetba ajanga yaküm küm nung tang tashi parnok majuruteptet ser Ravi Nagaland toktsür ogo. Atangji, Ravi melen Naga nungertem den Naga yimten ken o jembitsü asoshi tangar ka shimtetba osangbo tang tashi center government-i metetdakja mali saka Naga yimten nüchiso bushir teloktem den jembitsü atema center government-isa Intelligence Bureau nung taoba Special Director A.K.Mishra den Assam Chief minister, Himanta Biswa Sarma shimteta lir. Naga yimten ken o jembiba maparen nung tenaprongla ya tasen masü, anungji tenati Naga yimten telok ajak den ajurutepa ken o tatem küma jembitettsü imlar. NSCN-IM o Ravi na tsüngda majuruteptettsüsa tebilemstü adokba sülen center government-i A.K. Mishra nübo amshia Naga yimten teloktem den mapang tatsüka jembidakja aruogo, anungji tangbo paia Naga yimten tebilemstü ya kokteta aotsüsa lenmang tasen karbo ngutetter alitsü imlar. Ano külen, Assam Chief minister-ba ya Assam nung Congress-i yimsüsüba mapang nungi yimten nung tongti shilem agia aruba yimsüsür tain ka lir aser pa daka teimla aliba agi, Naga nunger lenirtem aikati pa bushia oagi Naga yimten tebilemstü lemsatepogo. Item ama nisungtem jagi mezüng Naga yimten onük jembitsü asoshi center government-i 1999 küm shimba nisung, K.Padmanabhaiah nungi tenzüker R.N.Ravi tashi nung jembia aruba onüktem nung kongsa telemtetba dangi marutettsüsa timtem liasü, item ajakji repringshia menua melii Naga yimten telemtetba kati arutsü imlar. Atangji, kasa Naga yimten nüchiso onük jembitsü atema center government-i, tangbo, kasa mapang nung nisung ana tenyabaji tebilemdangtsü ka lir. Ashiko, Himantai Nagaland state government nung yimsüsürtem den jembitsü aser Mishrai yimten nüchiso bushir teloktem den jembitsü ta lemsüktsü asütsüa akok. Iba mapa jagi center government tsütsüa Naga yimten tebilemstü ken o ya tekaratiba nung tembangnüba tanüla ka sayur. Atangji, Naga nüchiso bushirtem rongnunga telok teimba teimba küma telemsa adok nungji, Naga National Political Groups (NNPGs) denbo R.N.Ravi mapang nung ken o ajak tembanga jembioogo aser saka NSCN-IM telok den ken o metembangtetba agi tang tashi tatem tang telemtetba kati marutetba menur, kechiyong Naga nungerji kin ka dang aser yimten nukjidonga ka dang, anungji telatetbaa ka dang asütsüla ta asüba tangatetba nung atateper. R.N.Ravi mapang NSCN-IM telok den tangatetep kati marutetba timtemji Naga nunger temzüng aser wako balaka amshitsüba onük nung liasü. Atangji, aji yimten mapa nung kanga tongtibang onük aser tamaittsü lir. Ibaji parnok 2015 küm India den Framework Agreement latetba mapang komaka nung yimten jenjang latettsü artsüdang yoka aliar, iba dakji keta lir. Atangji, küm paika nung taküm senti taküm paikaya lalua rarar, Naga nunger yimten nüchiso mangu aser wako-a tamshidak maka ta tembangtsüba jagi tamakoksa rongnunga maksü dena anguba tamakok ka asütsü, anungji tang India kübok alir Naga nungertem ya India küboksa alitsü latetaka, Naga nunger asoshi temzüng aser wako balaka amshitettsüsa yimten jenjang ka latettsüsa tejembirtemi shisa tasen aser tesadem agi bilemdangtsüla. Atangji, Nagaland ya India küboksa alinungbo India kübok aliba government office-tem nungbo, tang amai, India wako –ang asongtsüsa akümstü, anungji Naga nunger wako aser Naga nunger temzüng amshitettsüsa Naga lima nung Naga nunger asoshi inyakba office-tema alitsüla. Iba ama yimten lenmang tasen ka pateta aotsübaji, Naga nunger nüchiso bushir lenirtem aser parnok den jembitsü nungloktsüba nisungtem den Nagaland government nung alir Chief minister Rio-i anir yimsüsürtem dak shisatsü alitsü nungdaker. Iba shisatsüji Tsüngrem nungi dang angutsü, anungji asenokia ochi mulung agi Tsüngrem dang Naga yimten tebilemstü koka latettsü atema lenirtem nem shisatsü agüjang ta sarasadema shilem agidi.

## OLEMSABANG

### Atepzüng aser Arrtsü atena oa Tenyaba mapa nung liromedem

~ Onenlemla

(Yashi adok nungi...)

Tanü alima rangpen yimtsüng ka ama dang akümba putu ka, mission mapaji jaka mashika aser mapang mashika nung inyaktsü akok. India lima state ajak nungi tamangba yimsü balala amangba purtem office, hachirawala, shishilembar aika Nagaland nung arua lir. Anungji home mission asoshi iba ya temoatsü ka amai lir. Bendang limai oa mission mapa inyakba ama, anogo shia asen den alir dang kulisüba mapa inyaktsü lemang adoktsür. Lim arogo kari item pur atema Pastor, Evangelist inyakdaksübaji kanga junger, saka Khristan ka ama asenokia taküm yimya agi sayutettsüla. Baptist tamanger kümang ta mashiyonga, Naga nunger Khristani yamai ochi inyaker, temeim inyaker ta sayutetbaji kulisüba nung tongtipangtiba ka lir ta metettsüla. Non- local nisung ka Khrista jilo ajizüker ora par shilu (same culture, same language and same people) aika tongtettsü aser ibaji asenoki missionary ka yokba den saku lir.

Mungdangi ayongba "Mission back to village" takok ngua aoba angur. Arogo tilatem yariba, lim arogo asüngsashiba mapatem ka kanga tongtipang. Asen aliba meküta Aor, Naga nunger aser non-local yi jemer, mozü achir aika angur, parnok taküm aser tanela jenjang yanglutsütsü home mission wadang tulu lir ta sayur. Mungdang, arogo aser telok kari rehabilitation, detox center lapoka inyaka arudagi aser aji kanga junger. Saka tang aliba dang nungi tali tajungba aser talila kar lapoka aotsü nungdak ta ajiteter. Ano noklang shilem nung kar dang rehabilitation, detox aser counselling centeri arur anungji tanüngba nisungtem ajurutsü sendong balala akatsüla. Arogoi item asoshi rongsen indoka anebaluba den counseling agüja tanela aser shi kümzüktsü lemang sayutsüla. Ano parnok shia dak aketba sempet tajung meteta training balala agütsüba ajanga tarutsü nung parnok jenjang kakabo angutsü.

Lim arogo ajak nung Khrista makaba Khristan aika lir. Tamanger kibong nung aso, mapang tatong nung tzü nung baptia arogo züngsem aküm, saka tekümtet maka aser tenlaki mangudangba (limapur Khristan) aika lir. Tanü lim arogo aser nung tashidak tulutibaji ya ka lir, parnok arogoi ayungba revival, retreat, camp memetet aser mangashi. Item nisungtem küm nung ken anaben ajurua sarasadem yutsüba agi kodanga memelenshitsü, saka parnok nem Lai O tesayuba tajung angatetdakja Khrista dangi anir arutsü nungdak, anungji arogoi item mapa asoshi rongsen aser nübu indoka inyaktsü lemang bushitsüla.

Lim arogo kari member care ministry takok ngua inyaka arudagi. Pei sasa litetsüsa lemang lanurtem nem sayua training balala agütsüba tali tajungba aser teimba inyaktsü ajungshitsüla. L. Lima Jamir-i DABA nung inyakba ka yamai shisem, "MEMBER CARE ministry ajanga tang tashi nung item ya arogoi full sponsor süa inyaka aruba kar shisemer. Item ya onoki inyaket ta asüba nung masü saka skill development training ya arogoi home mission budget nung inoker lanurtem yaritsüla aser akokba tashi nung self-employed süa self-reliance aser self-sufficient sütettsüsa aser ibai ajanga unemployment tebilemstü ya kangabo malitsü ta bilema yamai inyakdagi. Item ya tang teinyakdak lir. Ano lemangtem bushia arogo züngsem lanurtem yaritsü arogo tangatetba lir. Tang Covid wara ajanga online classtembo agidaki. Training yamai agütsür:

- Rehabilitation for alcoholic & drug addicts,
- Electrician,
- Computer training,
- Montessori training,
- JCB Driving,
- Art of cooking,
- Cutting & tailoring,
- Hair cutting,
- Hospitality,
- Aviation,
- Carpentry,
- Mason,

#### Iron bar binding for construction, etc

Item ajak ya govt, registered certificate agütsür. Local arogoitemi nungdakba trainingtem ya lanurtem nem home mission nung tongtipang shilem ka ama budget nung peria inoker agütsütsü. Nungdakba shisatsü agütsütepa yariteptsü lemang peria lir." Atepdang mission sendakba nung Mayang Longkumer ano yamai shisem, "Arogoi professional career and counselling center lapok nung koda? Mission hospital branch ka ka asenok Aor tzükong ajak nung lapok nung koda? Aoli arogoitem nung inyaker chirtem (timtema alirtem) atema Mungdangi Mission School ka Impur nung lapoker (with boarding) class 5-10 tashi free education agütsü nung koda?" Iba tenyaba mapa dang temang rangpen atema atepdang nungdakpur asoshi inyakba ta ashitsü akok.

Tanur sempet tajung aketer aika kibong sensak tia ajanga school/college mezüngteti aliba angur. Tangar kin asoshi mulungsoa yariba angur aser yamaji parnok school/collage azüngtsü asoshi züba zübar, aika free of cost azüngba nguogo saka college aser seminary balala nung asen nisung timtemer teyarir mali aika lir. Asen Aor dak timtemer yarinüba mulungsenttsü lir sünnung asen atepzüng senzüka toktsüba aika ajiteter anungji arogoi scholarship agüja mesüra kibong kar teyari agia, arogo ajanga yamala tanur sempet tajung akaba yaritsü lemang sayuteptsüla.

Ano atepdang tenyaba mapa ta asüba nungji yimtsüng nung tenzükeritem ita sen tepok sünga magütsüba yaa dena lir ta angatettsüla. Tepok sünga magütsüba agi tanur school nung mezüngtetba, kibong nung timtem ajuruba, arogo mapa nung tamakok aluba ngua arudagi. Anungji tangar mission agency-i inyakba ama arogoi mesüra Mungdangi school kar den tesendaktep yanglua tenzüker chirnurtem asoshi hostel aser achool fees tera tajemba nung azüngtettsü lemang bushitep nung ajungtsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Nagaland Bible college nung tesayur aser staff-tem shisatokden aka



September 18 nü Nagaland Bible College ketdangsürtem den tesayur aser staff-tem one-day retreat Metsüben Resort nung akadang shisalen sayur den külemi tangokba noksa nung angur. Mokokchung, September 19, 2021.

**Mokokchung, September 19 (TYO):** Nagaland Bible College Mokokchung ketdangsürtem den tesayur aser staff pur one-day retreat sentong ka September 18 nü Metsüben Resort nung takok ngua kaogo, ta NBC osang ka ajanga metetdaksü.

Iba sentong nung shisalen sayur taoba mapang Fazl Ali College nung Principal aser Watsü Mungdang Tir, Arenla-

i jembidang lai, tanü theological college mesüra holistic institution-tem nung tongtibang teinyaktsü kaji kaket shisashiba tsütsü (academic oriented) dang masü saka tanela (spiritual) nunga liru medema ora, item kaket rejutem nungi adokba tazüngertem aser tenzükertemji tanü Arogo, lokti aser yimden balala asoshi tajangzük agütsüetba aser

tagidak akaba tazüngertem asütsü, ta ashi.

Shisalen sayur ajangasa tesayur mapaji tamaren mapa, tesayur kaji tatishitsü sayur ka, tesayur kaji linük yanglurtem aser tesayurtemji Tsüngremer yimli asoshi nungloktsüba mapa inyakertem kaka lir, ta asüba onük balala nungi shisa tarok lemsatapa liasü, ta NBC sangdong ajangasa metetdaksü.

## BJP-i Chhattisgarh sorkar aser missionary tem anema longkak ait

**Raipur, September 19 (Agencies):** Chhattisgarh nung Khristan missionary temi Hindu nungertem aser tribal nisungtem Khristan yimsü dangi meyipdaksür, ta tai tonglokja taoba hopta state nung opposition BJP-i 'Halla Bol' tenzüka liasü.

State nung assembly election agitsü ano küm ana shi lia taküm July ita nung Sukma district nung SP-i, Khristan missionary temi tribal nisungtem Khristan yimsü dangi meyipdaksür, ta tai tongloktsüba sülen mangatettep tulu adoka liasü.

BJP-i ashiba agi, state sorkari pusema state nung Hindu nungertem aser tribal nisungtem Khristan yimsü dangi meyipdaksür.

Taoba hopta BJP MP tem, MLA tem, party lenirtem aser züngsemtemi sorkar aser Khristantem anema Azad Chowk nungi Raj Bhawan tashi longkak aita jaja aoba sülen parnoki state Angh, Anusuiya Uike nem temepishiba shidi ka agütsü.

"Onoki Angh dang tamangba yimsü meyipdaksüba kanga bulua akümba tebilemsü lemsatap aser state sorkari parnok nungiter ta shiogo," ta taoba mapang BJP national president, Raman Singh-i osangbeneretm nem metetdaksü.

Ano BJP state president, Vishnu Deo Sai-i, tamalenbo Khristan missionary temi tribal nisungtem ang mesüzüka Khristan yimsü dangi meyipdakja liasü, saka tangbo linük yimtiba, Raipur nungi

tenzüka kanga tezülen aliba tribal tesemtem nunga yimsü meyipdaksür. Anungji onoki Angh dang yimsü meyipdaksüba nokdangtsü atema mepishio," ta metetdaksü.

September 13-14 anogotem nunga BJP lenirtem aser züngsemtemi maneni block level nung longkak aita liasü.

Chhattisgarh state nung aliba yimtsüngtem nung yim daklirtemi Khristantem sendokba anema Khristantem ozüng ka benoktsü atema takhangba agütsüdar.

Tamangba yimsü balala tsüngda kibong akümba, tamangba yimsü meyipba mesüra akhi sobaliba yimya sendokba kulitem nung ajemdaker Khristantem loktiliba nung sendoker, ajisüaka itemji nokdangtsü atema Centre mesüra state jenjang nung ozüng mali, ibayongji Catholic densema Khristantem lenirtemi loktiliba nung sendokba anema ozüng ka benokdaksüner.

Talisa Hindu nung nütüng timba aliba yimtsüngtem nung lokti nung Khristantem sendoker aser tamangba yimsü nung ajemdaker Khristantem den shishilemba masür mesüra yim dak tzü metadaksür aser dokan nung meshishidaksür.

India kübok yimtsüngtem nung Khristantem sendokba rongnung- yimer kiojen mamshidaksüba, tzü metadaksüba mesüra dokan nung meshishidaksüba densema lir, ibaji ajanga Khristantem kanga timtemer.

Persecution Relief-i ashiba

agi, India nung Khristantem alitsü atema state tamajungtiba ana- Uttar Pradesh aser Tamil Nadu na sülen tasembuba jenjang nung Chhattisgarh lir.

Khristan lenirtemi ashiba agi, Hindu yimsü alia amanger telok balalai India ya Hindu linük kümdaktsüner, aser iba nükjidong nungji ajemdaker parnoki Khristantem reshikangshia tanaben Hindu yimsü agizükdaktsütsü meranger.

## Taküm Khristmas anogo nung 'American Underdog' film sayatsü



**September 19, 2021:** American football asayar, Kurt Warner indang taküm otsü nung ajemdaker yangluba Khristan film 'American Underdog' taküm Khristmas anogo nung sayatsü.

Family Lionsgate indang film ya Khristmas anogo nung sayatsü, iba tetezü Tsüngremeri film atema kishi lapoktsür, ta film director Andy Erwin-i metetdaksü.

Iba film nung tongti shilem agirji Zachery Levi ("Shazam," "Chuck") aser Anna Paquin na lir. Iba film ya Kurt Warner

## ANO GO ABEN TSÜNGREM DEN

### Temeshiba asoshi ne sasa angazükang

*Saka memeshi aser tantsür tar nunger otsü tagi. Aser ne sasa temeshiba asoshi meranga inyakang. 1 Timoti 4:7*

Laishiba ajunga nung Tsüngremeri asenok dang meinyaktsü indang dang ashir masü saka paidoktsü indanga ashir. Pauli Timothy Yisu Khrista tenzüker tajung ka akümtsü, tamang O agi maneni mesütsü ashi. Ano kechi meinyaktsüla iba indanga ashi. Tar nunger otsü nungi pilaa alitsü indang ashi. Alima otsü nungi talangka pilaa liang. Alima otsüji temeshiba den meputep. Tiyazü tesayurtemi nisung shisatsü aser tiyazü tesayuba bener arur koba agi shirnoki iba atema mita alir, parnok dak tanelaren lendong adokdaksür. Pauli aji paidokang ta ashi. Temeshiba akümtsü asoshi ne sasa azüokang.

Tsüngrem mulungsentsü teindangji temeshiba lir. Temulung asüba den iba temeshibaii tajangzük tulu agütsür (1 Timothy 6:6). Ibai tamanger ajaki aginür. Saisapongeri tazüokba Oji amshir. Tasemtepba nung takok angutsü asoshi saisapongertemi iba tazüokba parnok sasa alir. Ibai metetta telemtetba agiba lir. Tanü asenok asoshi Khristan taküm ajaba tasemtepba nung takok ngunüra asenoki tejangja telemtetba agitsüla. Asenoki asen kolok aser temang Tsüngremeri amshitsüsa azüoktsüla aser angazüktsüla.

Asenoki ya koda inyaktsü? Asenoki mokrema Tsüngrem den mapang agitsüla, Khrista asoshi sarasadem nokinketer ka akümtsüla, Tsüngrem O nung mapang indokba ajanga, azüngba, shisadangba, bushiba aser temulung agi angazükba ajanga asenoki ya inyaktet. Tanü iba Telemtetbaji agiang aser anogo shia aji amshiang.

Kü Kibur, Khristan ka ama mapa lidaktsüner ta ni metet aser tanü ni Na anasa kümdanga jajadakang. Amen.

"American Underdog" film dak sendakba nung pai, "Iba otsü ya tebur kati pa kinüngtsü den par kibong atema raraba film lir. Pai tanur tetsü, Brenda den kibong aküm, aser la tanur ana liasü aser tanur ana rongnungji kabo tera mabensa-nükpoker liasü. Pai par kibong kanga meim, aser par kibong ajanga pa nisung tajungba aküm," ta metetdaksü.

Iba film otsü ya David Aaron Cohen ("Friday Night Lights"), Jon Gunn ("I Still Believe") aser Jon Erwin ("I Can Only Imagine") nungeri zülu. Film otsüji Warner-i pa taküm otsü züluba kaket 'All Things Possible: My Story of Faith, Football and the First Miracle Season' nung ajemdaker yanglu.

"Iba film ya benjung mongpu den kanga tapet. Tamang tashi indang film ka, koba ajanga pei taküm tajungtiba yanglushitetsü," ta Lionsgate Motion Picture Group Chairman, Joe Drake-i sangdong ka ajanga metetdaksü.

taküm otsü nung ajemdaker yanglu. Pa ya supermarket nung inyaka liasü aser tesülen Super Bowl takok angur nungtugu saisaponger ka aküm.

"Film atema Tsüngremeri kishi lapoktsür. John, ni aser Kevin nunger longjemer iba film produce asütsü, ta ni bilema maliasü," ta interview ka nung Andy Erwin-i metetdaksü.

Erwin-isa, "Iba otsü ya kanga junga yanglutet aser Family Lionsgate-ia onok nungitogo. Khristmas anogo nung iba film sayatsü atema Lionsgate-i onok dang mela," ta metetdaksü.





Lucknow, September 19, 2021: Amongnü Lucknow nung Uttar Pradesh Chief Minister, Yogi Adityanath-i pai aniba sorkar kum pezü ser tesimalong ajungba dak sendakba kaket ka sayaba mapang tangokba noksa nung angur. Kasa noksa nung Deputy CM ana- Dinesh Sharma aser K P Mauriya na den UP BJP Tir, Swatantra Dav nungera angur.

## UP nung kum pezü ser tesimalong tsungda rara maliasü: CM Yogi

**Lucknow, Rongjui/ September 19 (Agencies):** Amongnü Uttar Pradesh Chief Minister, Yogi Adityanath-i, tesüiba kum pezü ser tesimalong tsungda state nung pa yimsüsüba kübok rara khenyongi maliasü, ta metetdaksü.

Sangkum Uttar Pradesh assembly election nung takok ngur Chief Minister maneni inyaksü nükjiong alisang Adityanath-i, state nung BJP sorkar aruba sülen India tesem ajaki state nung temelenshi aliba metetogo, ta ashi.

Osangbenertem den jembidang pai, "Uttar Pradesh ama state ka nung security aser yimsüsüba tajung lia kum pezü

ser tesimalong abensabaji kanga tongtibang. Linüki state indang bilemba melenshiogo. Tamalenbo UP nung rara kanga adoka liasü saka tesüiba kum pezü ser tesimalong nung rara maliasü," ta metetdaksü.

"Ozüng kübok onoki kin-kidong, tesem mesüra tamangba yimsü kecha mebendangi ozüng alema inyakerkem aser auertem azüoktetogo. Sen crore 1,800 jenjang sorkar meyong kiojen meyipa nguogo aser ozüng alema inyakerkem atsünga agiba meyipa nguogo," ta pai ashi.

"Kü yimsüsüba kübok 'Ease of Doing Business' national ranking nung Uttar Pradesh

state-i jenjang tanabuba alanzükttetogo," ta pai ashi.

Sangkum Uttar Pradesh nung assembly menden 403 atema election agitsü aser iba election nung shilem agitsü tongti party temji BJP, SP, BSP, Congress aser AIMIM party tem lir.

Yogi-i pa yimsüsüba kübok rara maliasü, ta shiaka yakum February ita nung state assembly nung Samajwadi Party MLA, Rakesh Pratap Singh-i asungdangba ka langzudang Yogi Adityanath-i, tesüiba ita trok tsungda Uttar Pradesh nung longkak aйдang aser raradang nisung 21 süogo aser police 400 dak tema yiruogo, ta metetdakja liasü.

## Jaishankar-i Saudi Foreign Minister den Afghan tensa atema jembibi

**New Delhi, September 19 (Agencies):** Amongnü New Delhi nung India External Affairs Minister, S Jaishankar-i Saudi Arabia Foreign Minister, Prince Faisal bin Farhan Al Saud den senden amendang Afghanistan tensa densema region dak sendakba tongtibang onük aika nung o lemtepogo, ta ketdangsertem osang ka ajanga metetdaksü.

Ministry of External Affairs sangdong ka ajanga, Jaishankar-i New Delhi nung aliba Hyderabad House nung Saudi Arabia Foreign Minister, Faisal bin Farhan Al Saud ajuru, ta metetdaksü. MEA sangdong ajangasa, "Minister anapronglai Afghanistan tensa aser region

dak sendakba tongtibang onük aika nung o lemtepogo. Tenatisa linük ana amalitepa inyakba aser UN, G-20 den GCC nunga amalitepa inyakba jenjang asadang. Coronavirus wara liaka yakum G-20 nung Saudi Arabia-i Tir mapa junga inyakba atema EAM-i tenüngsang agütsü," ta metetdaksü.

Coronavirus wara tenzükba sülenbo tang mezüng Saudi Arabia nungi Minister kati India semdang. Prince Faisal bin Farhan-i anogo asemnü atema New Delhi semdang.

"2019 kum October ita nung Ato kilonser Narendra Modi-i Saudi Arabia semdangba mapang nung linük ana tsungda Strategic Partnership Council

Agreement sign süa liasü, aser minister anati ibajia asadangogo. Iba tezüngzüktep kübok senden amenba aser terenlok aliba ajanga tena kanga melung süa liasü. Linük anapronglai maneni shishilembaba, investment, energy, defence, security, sobaliba, consular, health care aser human resources tsütsü amalitepa inyaksü atema bangjemogo," ta EAM sangdong ajangasa metetdaksü.

Coronavirus wara mapang nung Saudi Arabia-i India nung yariba atema EAM-i pelaba lemsatop aser Saudi Arabia dang India nung Saudi Arabia-i aoba tenokdangba aliba agienang, ta mepishia liasü, ta kasa osang ajanga metetdaksü.

## 2020 kum India nung anogo shia gari lendong nung nisung 328 asü

**New Delhi, September 19 (Agencies):** 2020 kum India nung coronavirus wara anema lockdown liasü, ajisüaka mekümdangba agi gari lendong nung nisung lakh 1.20 dak tema asü, aser ibaji anogo shia nisung 328 shi asüba den kasa lir, ta NCRB-i metetdaksü.

Mekümdangba agi tesüiba kum asem tsungda India nung gari lendong nung nisung lakh 3.92 dak tema asü, ta National Crime Records Bureau (NCRB)-i 'Crime India' report ajanga metetdaksü.

2020 kum nisung lakh 1.20 asü, 2019 kum nisung lakh 1.36 asü aser 2018 kum nisung lakh 1.35 asü, ta NCRB-isa metetdaksü.

2018 kum nungi tenzuka 2020 kum tashi nung gari agi nisung dak tsükoktsür ajenba tatalokba lakh 1.35 shi liasü, ta Union Home Ministry kübok inyakba NCRB-i metetdaksü.

2020 kum kija nunga nisung dak tsükoktsür jena aoba

tatalokba 41,196 liasü; 2019 kum item ama tatalokba 47,504 aser 2018 kum tatalokba 47,028 liasü.

2020 kum railway nung mekümdangba ajanga nisung 52 asü, 2019 kum nisung 55 asü aser 2018 kum nunga nisung 35 asü.

2020 kum nungsa medical teyari magütsüba ajanga nisung 133 asü, ta NCRB data nung shia lir.

NCRB-i ashiba agi, yakum coronavirus wara prokba nokdangtsü atema March 25 nungi May 31, 2020 tashi India tesem ajak lockdown süa liasü, aser iba mapang nungi nisung kangabo mesenzü, saka gari lendong aika atalokogo.

"Lockdown aliba agi tetsürtem, tanurtem aser teintet sensotem anema inyakba ken o kanga ajema akum. Iba denji külemi ki kakpoka auyaba mesüra rakzüktraktemba ken o kanga ajema akum," ta kasa report ajanga metetdaksü.

## Punjab nung Chief Minister menden atema Charanjit Singh shimogo



Punjab Chief Minister tasenba, Charanjit Singh aser Congress MP, Rahul Gandhi na tamalen tangokba noksa ka yangi angur.

## EAM S Jaishankar-i Russia Foreign Minister Sergey Lavrov ajuru

**New Delhi, Rongjui/ September 19 (Agencies):** Amongnü (September 19, 2021) Congress party-i Punjab Chief Minister menden atema Charanjit Singh Channi shimogo; pai Captian Amarinder Singh menden melenzüktsü.

Punjab Congress Legislative Party (CLP)-i Channi lenir shimba sülen chief minister menden atema pa shim, ta party osang ka ajanga metetdaksü.

Charanjit ya Chamkaur Sahib menden nungi tang agi tasembenbuba MLA inyaker. Arrshi kum 49, Channi ya Technical Education & Industrial Training, Science & Technology Minister inyaka liasü aser party-i pa CM shimtsü ta pai mimlai liasü, ta osang angazüker.

Sangkum Punjab nung assembly election agitsü lia Chief Minister Amarinder Singh aser state Congress Tir, Navjot Singh Sidhu na tsungda mangatetep tulu adokba sülen

anogo ka jakdang Singh-i CM menden nungi anena liasü.

Amongnü AICC general secretary, Harish Rawat-i twitter ajanga, "Punjab nung Congress Legislature Party senden nung ajaki melunga Charanjit Singh Channi lenir shim, ta ni tepela nung sangdonger," ta metetdakja liasü.

Honibarnü arrshi kum 79, Amarinder Singh-i CM menden toktsü. Pai Congress Tir, Sonia Gandhi den jembiba sülen CM menden nungi anenba shidi agütsü, iba sülen Honibar nikongdang Congress Legislature Party senden mena liasü.

Pa CM menden nungi anenba sülen CM menden atema taoba mapang Punjab Congress Tir, Sunil Jakhar, tang state Congress Tir teinyakdak, Navjot Singh Sidhu mesüra Tript Rajinder Singh Bajwa aser Sukhjinder Singh Randhawa nung rongnung ka shimtsüa akok, ta bilema liasü.



September 19, 2021 nü Haldwani nung osangbenertem senden ka nung AAP tongti lenir aser Delhi Chief Minister, Arvind Kejriwal-i jembiba noksa nung angur. Kasa noksa nung taruba Uttarakhnad assembly election nung AAP nungi Chief Ministerial candidate, Col. Ajay Kothiyal-a angur.



Inspiration4 ajanga sayaba noksa ka nung SpaceX capsule nung amener abelen nungi achichi, Hayley Arceneaux, Jared Isaacman, Sian Proctor aser Chris Sembroski nungertem Florida tzukum anasa Atlantic nung parnok mena aliba capsule tsükba nungi temai adoker tangokba angur. Astronaut takotet medeni alima lunga jajartem rongnung par pezü ya mezünpur kumogo.

## Tetsürtem pusema Afghan nung teburtemi school-i maotsü lemtet

**Kabul, Rongjui/September 19 (Agencies):** Taliban-i Afghanistan atsünga tetsürtem nem tenokdangba agütsür aliba mapang Afghan nung teburtemi tetsürtem pusema school-i moi atatsü telemteba agiogo. Afghanistan nung tang tashi tetsürtem school-i aotsü temelaba agüja mali.

Teburtem ajak school-i aoba mapang teburtem kari school-i moi atatsü telemteba agi aser ashiba agi, lokti nung nütsünyongsök tesadangkabo tetsürtem lir aser tetsürtem atema school melapoktsü tashi parnoka school-i maotsü, ta Wall Street Journal sangdong ka ajanga metetdaksü.

"Lokti nung nütsünyongsök tesadang kabo tetsür lir.. tetsürtem atema school melapoktsü tashi ni school-i maotsü," ta arishi küm 18 tain class 12 nung azünger Rohullah-

i ashiba WSJ-i metetdaksü. Taliban education ministry-i Hokolbarnü teburtem atema secondary school tem lapoktsü tetuyuba agütsüogo, saka tetsürtem school-i aotsü atema temelaba agütsütsü magütsütsü, aji tang tashi mejangjai lir. "Tebur tesayurtem aser kaketshirtem ajak educational institution temi aotsüla," ta ministry sangdong ka ajanga metetdaksü.

Taliban otongdar Zabihullah Mujahid-i Honibarnü local Bakhtar News Agency dang, tetsürtem atema secondary school tem lapoktsütsü asoshi sentong yangludar ta ashi, saka anogo tejangja ka mesangdong. Reuters den sensaksemba mapang Kabul nung private school tesayur kati school melapok tsünga temelenshi aika bener aruba indang metetdaksü. "Tetsürtem anepdang angazüker aser

teburtem anüngdang angazüker. Tebur tesayurtemi tebur kaketshirtem sayur aser tetsür tesayurtemi tetsürtem sayur," ta tesayur yagi ashi. Tesayur kari ashiba agi, tetsür kaketshirtem karbo temulung kanga ademogo aser school-i aotsü maotsü mejangjai lir.

Kasa mapang nung UN-i Afghanistan nung tetsürtem school-i aotsü asoshi teblemtsü kaa bilemba lemsatepogo. "Tetsür tain tanur ajak takaratiba nung kaketshisatsü angazük tenzükdaksütsü kanga tongtibang aser iba atema tetsür tesayurtemi tesayuba agütsü tenzüksüla," ta Unicef-i ashi.

Taliban-i taoba mapang yimsüsüba yimya nung parnoki yimsü masütsü ta tenangzükba agütsüogo, ajisüaka Afghanistan nung tetsürtem jenjang mejangjai lir.

## 2022 nung Philippines tir atema Manny Pacquiao tokteptsü

**Manila, Rongjui/Sept. 19 (Agencies):** Philippines Tir Rodrigo Duterte melentsü atema 2022 tir election nung tokteptsü atema senator Manny Pacquiao-i PDP-Laban party indang nomination agizükogo.

"Lenir asoshi tokteptsü atema renema lir," ta Pacquiao-i Deobarnü iba maongka agizüka jembiba mapang ashi.

Pacquiao-i aniba telok ya Deobarnü national assembly amen, kong party züngsemtemi pa iba menden asoshi tokteptsü atema shimteta liasü. Par PDP-Laban faction nungi züngsemtemisa Pacquiao nem pa indang running mate aser pa tang mena aliba Senate menden atema nübu shimtsü pa nem nungloksü.

Boxing asayar nungi yimten yimsüsür akumsang ya ochimashi anema nokdaksü, ta ashi.

"Republic of the Philippines

indang tir candidate atema nenok nomination ni agizüker. Tajemzükba jenjang nung alirtemi takok angutsü tang mapang lir. Asen linük makamait jenjang nungi saksü mapangji tangya lir. Sorkar temürek atema tangya mapang lir," ta pai ashi.

Iba senden ya mamendang Pacquiao ya tir atema tokteptsü sentong temai madoki liasü. Taoba mapang pai tir atema tokteptsü, senator atema ano tokteptsü mesüra yimten yimsüsüba mapa yutsütsü, ta shia liasü.

Pai ano dangar tir atema tokteptsü akok ta imla aliba Vice President Leni Robredo aser Manila Mayor Isko Moreno nungertem den ajurua liasü, saka jembishinü nung takok mongutet amai lir.

Tir atema tokteptsü yimjak nung sangdongba yimten yimsüsür rongnung Pacquiao ya

tanabuba lir. Senate nung külem tenzüker Senator Panfilo Lacson-ia nübuyim tenzüko.

Ano Senator Bong Go ya Philippines tir atema tokteptsü amai lir, shiba PDP-Laban nung dang faction temi tir atema shimteta liasü. Duterte-i vice president atema tokteptsü nomination agizükogo, saka Go-ibo pai metokteptner ta ashi.

Ajisüaka tang atsütepa aliba PDP-Laban telok balala ya Commission of Elections indang telemteba atatsü, shirnoki 2022 elections atema camp recognize asütsü.

June ita Pulse Asia survey agiba nung arishi küm 42 tain Pacquiao ya 2022 election nung tir atema candidate rongnung jenjang pongububa nung liasü. Pa dang Davos City Mayor Sara Duterte aser Manila Mayor Isko Moreno nung kanga agi tematiba jenjang nung lir.

## Imran Khan-i Joe Biden pusema jembi

**Islamabad, Rongjui/September 19 (Agencies):** Pakistan Ato Kilonser Imran Khan-i US tir Joe Biden pusema, Afghanistan nungi US sepaitem anintsü atema pai telemteba shidak agiogo aser iba atema pa tim mesüi aitsüogo, ta ashi. "Tir Biden tim mesüi aitsüogo. Pai tinyaktsü mapa shidak inyakogo," ta Khan-i September 17 nü Russian news channel ka den sensaksemba mapang ashi.

Khan-i ita ka tejakdang Afghanistan nung jana toktsür aoba Pakistan-i merektetsü toktsüba atema US aitsüba sülen tang America tir pusema jembiogo. "Küm 20 tashi military dak sendakba nung ken o bentettsü atema merandangba sülen mepetmesü adoka toktsüba bentettsü mapang nungdang Pakistan ya tagidak ali ama züngshir," ta Khan-i August ita Taliban-i Kabul matsüng tsünga Islamabad nung osangbenertem dang ashi.

Afghanistan nungi sepaitem aninba atema Khan-i Biden aija aruogo. June ita tatemlen New York Times den sensaksemba mapang pai, America nung sepaitemi Afghanistan toktsür aoba ajanga Taliban azüoktsü atema Pakistan tashi ajemdaksüba asoshi America aitsü. "United States-i parnok atsüngintsüba anogo sangdongba sülen Taliban azüoktsü atema onok tashi ajema aküm. United States-i anogo latettsüba sülen Taliban puri takok ngur ama bilem. Parnoki rara kokogo ta bilemer. Anungji parnok azüoktsü atema onok tashi makai aküm," ta Khan-i ashi.

Afghansitan nungi sepaitem anintsü atema telemteba agiba atema alima kin balala aser US nung opposition yimden yimsüsürtemi Biden kanga mejungi aitsüogo. Parnoki ashiba agi, sepaitem kanga kara anintsü telemteba agiba ajanga Taliban nem maongka tali agütsü.



Akhmat-Yurt, Russia nung Parliamentary elections agiba mapang Chechnya regional lenir Ramzan Kadyrov-i polling station ka nung vote agütsüba noksa ka yangi angur. Parliament tasenba atema asemnü vote agütsüba ya Deobarnü temogo aser Tir Vladimir Putin busemba United Russia yagi State Duma nung takok mangutsü amai asadangteta lir.

## Gari lendong nung Johannesburg mayor Jolidee Matongo asü

**Johannesburg, Rongjui/Sept. 19 (Agencies):** Johannesburg indang mayor tasenba, arishi küm 46 lia gari lendong nung asüba sülen South Africa Tir Cyril Ramaphosa-i asükhü lemsatepa liasü.

Jolidee Matongo ya iba lendong majurudang Ramaphosa den nübu yima jaja liasü.

Iba lendong atalokba indang osang tejangja mali saka media balala nung noksa sayuba nung pa indang gari tejaklen kanga mejungi tsüksar liasü.

Matongo ya pa jakdang inyaka alisang COVID-19 tashidak agi asüba sülen August 10 nü mayor aküm.

Pa ya Zimbabwean migrant ka jabaso aser arishi küm 13 alidang nungi South Africa nung political activist ka liasü, shibai South Africa nung kin dak ajemdaker tim masü mapa inyakba anema nokdaka liasü.

Pa ya yang yimsü tesüdak African National Congress

(ANC) nung züngem ka liasü aser November 1 nü South Africa indang commercial capital, Johannesburg nung local government elections nung takok angutsü asoshi nübuyimba nung tongti shilem agitsü liasü.

"Mayor Matongo-i asütsü mapang tatsüka lia küden aser Soweto nung alirtem den jembiba bilemdang iba lendong atalokba ya temolung agi agizüktsü tasak lir," ta Tir Ramaphosa-i ashi.

"Ajungbena iba ama takoksa ajurutsü atema asenok shinga renema meliasü, koba asen linük indang economic centre nung ita ana tsünga executive mayor tanabuba asür."

Taoba mapang Johannesburg mayor aser opposition ActionSA lenir Herman Mashaba-ia pa aser Matongo na yimtenren tsütsü tangatetba balala liaka tena tsünga tesendaktep kodanga mesamatsü, ta ashi.

## Anupam Kher-i honorary doctorate agizük



**New Delhi, Rongjui/September 19, 2021 (Agencies):** Hindu University of America ajanga nungtugu actor Anupam Kher nem Hindu studies nung honorary doctorate agütsü.

Honibarnü, Manhattan, New York kübok Hindu Vedic sentong ka ayonga agiba mapang, Kher nem Philosophy of Hindu Studies nung 'Degree of Honorary Doctrate agüja liasü.

"Iba doctorate agizüksü kü nem maongka agütsüba asoshi nüma-atanger. Ni asoshi iba jenjang ajangzükteba ya kanga dang tuluka aser taküm nung ni takok tulu anguba rongnung iba

ya ka asütsü; aser kü molung nung teti alitsü. Hinduism indang philosophy jembitsü asoshi iba Doctorate ajanga kü nem sabang ka agütsü, philosophy ya alima nung sobaliba tejen ka asütsü," ta Kher-i ashi.

Hindu University of America ajanga iba tetushi award atema Kher dang asüngdanga mapang, arishi küm 66 tain Kher-i, iba award agizüksü asoshi ni molunga liasü, ta ashi.

Iba honorary doctorate agizükba dak alia, America nung, Kher-i yimti balala sema senziüogo aser pa indang show tasen 'Zindagi Ka Safar' nung pai audience den

sensaksemogo.

Kher-isa America nung pa indang film "Shiv Shastri Balboa" tangokdar aser iba mapang pai India nung balala den ajurutepa liasü.

Taküm nung takok anguba tepela temaitsü sayutsü aser teimla indang osang proksü asoshi lokti den sensaksem akatsü kanga dang tongtibang ta ni bilemer, ta Kher-i ashi.

Kher-i ashiba agi, iba show 'Zindagi Ka Safar', achaayanga agitsü asoshi ni sentong meyangu. Nübur den sensaksemtsü aser parnok tebilemba angadangtsü asoshi iba show agitsü tasa atongtet. Iba show ajanga ni dang masü saka shilem agir ajak ajangzükogo.

America tesem balala aser alima tesem ajunga nung iba show achaayanga agitsü asoshi aikati kü dang asüngdangogo, ta Kher-i lemsatp.

Alima ajunga asüngba Covid-19 tensa ka nung, Kher-i "The Last Show" aser "Kashmir Files" densema film asem nung mazüngi inyakogo. Iba den külemi pai kakat ka züluogo.

India-i tanaben shilanger sülen, acting tsütsü Kher-i film yanglur Sooraj Barjatya den longjemmer "Oonchai" film tangok tenzüksü.

## Amazon Prime Video nung 'Bhramam' sayatsü

**New Delhi, Rongjui/September 19, 2021 (Agencies):** Malayalam crime thriller "Bhramam", koba nungtugu Bollywood film "Andhadhun" nung ajemdaker yangluba otsü ka asütsü, iba film Amazon Prime Video nung October 7, 2021 nü sayatsü, ta Deobarnü Amazon Prime Video sangdong ajanga metedaktsü.

AP International aser Viacom18 Studios na longjemmer produce asüba "Bhramam" film ya cinematographer agi director melensang Ravi K Chandran-i direct süogo. Iba film ajanga, jakla ana aketba pianist taküm otsü sayutsü, kong South star

Prithviraj Sukumaran-i nüpkoker ka ama jilu ayiba angutsü.

"Bhramam" nung Unni Mukundan, Raashi Khanna, Sudheer Karamana aser Mamta Mohandas nungeri tongti shilem agiba agiogo.

Amazon Prime Video, India indang Director & Head, Content, Vijay Subramaniam-i ashiba agi, film talisa "Cold Case" aser "Kuruthi" sayuba sülen, iba film atema team-i tanaben Prithviraj den longjemtsü yongyar.

Bollywood indang "Andhadhun" nung Ayushmann Khurrana, Tabu aser Radhika

Apte nungeri tongti shilem agiogo. Andhadhun film ajanga National Film Awards nung Best Feature Film in Hindi, Khurrana atema Best Actor aser Best Screenplay award nguogo.

Andhadhun ya Telugu oshi nunga "Maestro" ta nungja agütsü yangluogo aser September 17, 2021 nü Disney+ Hotstar nung sayaogo. Ano, "Andhadhun" film ya Tamil oshi nung "Andhagan" ta nungja agütsü yanglutsü sentong lir. Tamil version nung Prashanth, Priya Anand, Karthik aser Simran nungeri tongti shilem agiba angutsü.

## Aamir Khan-i 'Green India Challenge' nung shilem agiogo

**Hyderabad, Rongjui/September 19, 2021 (Agencies):** Deobarnü, Hyderabad yimti kübok 'Green India Challenge' sentong nung, Bollywood actor Aamir Khan-i shilem tajung agia süngdongtem tema liasü.

Tang, Aamir ya maparen ka atema Hyderabad nung lir aser Begumpet kübok airport nung ayongba Green India Challenge nung pai shilem agiogo. 'Laal Singh Chaddha' nung tongti shilem agisang Aamir-i co-star Naga chaitanya aser Rajya Sabha MP Joginapally Santosh Kumar na den külemi süngdongtem temoktsüogo.

Green India Challenge mapatong tejakleni bener aotsü asoshi meranga inyakba atema, Aamir-i Santosh Kumar dang pelaba metedaktsü aser iba sentong nung nübur ajaki tangatetba tajung nung shilem agitsü asoshi telok ayongzük.

Aamir-i, tayongzükba jenti ajangshia aruogo saka lipüküm aser libajen kümzuka ayutsü asoshi Green India Challenge ya mapatong tongti ka kümogo, ta ashi.

Green India Challenge nung teshimtet nübu ana Ram Mohan aser Raghava naprongla iba sentong nung denogo.

Tang tashi, iba Challenge' nung tongtibang nübu talisa Amitabh Bachchan, Sachin Tendulkar, Sanjay Dutt, Ajay Devgn, Shruti Haasan, Shraddha Kapoor, Chiranjeevi, Nagarjuna, Prabhas, Krishna, Pawan Kalyan, Mahesh Babu, Rajamouli, Samanta, Pulella Gopichand, P.V. Sindhu, Saina Nehwal aser Sania Mirza nungeri shilem agiogo.

Maneni, acting tsütsü, Aamir-i 'Laal Singh Chaddha' nung tongti shilem agiba angutsü. Advait Chandan-i direct asüba film ya Oscar Award anguba 1994 film 'Forrest Gump' nung

ajemdaker yangluba otsü asütsü. Iba film nung Hollywood star Tom Hanks-i tongti shilem agiogo.

Aamir dak alaka, iba Hindi version nung Kareena Kapoor Khan-ia tongti shilem agiba angutsü. Telugu actor Naga Chaitanya-i army officer ka ama film nung shilem agitsü. Laal Singh Chaddha ya Naga Chaitanya indang mezüng Bollywood film asütsü. Naga, ya Tollywood actor Nagarjuna'er jabaso lir. Iba film nung, Mona Singh-ia tongti shilem agiba angutsü.

Taruba film 'Laal Singh Chaddha' indang shilem timbaka Punjab aser Ladakh nung tangokogo. Iba film yanglutsü asoshi, 2018 küm Aamir Khan-i film indang 'rights' angu aser 2019 küm production maparen tenzük. Taoba küm Christmas mapang iba film sayatsü renem, saka Covid-19 ajanga film tangokba maparen thina liasü.

## OFFICE OF THE YAONGYIMSEN LONGKUM MANGKOTONGMENTSUR TELONGJEM

DIMAPUR-797112, NAGALAND

Date - 19/09/21

### KONANG ASER TETUSHI AGÜTSÜR

1. Asür Mr & Mrs. Tsüngkolepzü Longkümer jala Wt. L. Achila Superintendent (Directorate of Sericulture Nagaland Kohima) jenjang tashi tongtetogo.

2. Mr & Mrs. Imtichuba Longkümer jabaso Wb. Yashiwati, AG III (Depot) Food Corporation of India (FCI) nguogo.

Nenati jenjang tulu ngutetba asoshi asen kin Mangkotongmentsür Telongjem Dimapur Unit-i tenüngsang agütsür. Nübertem asoshi Tsüngremi nena taküm aser wadang ajak nung azükarua moajangma.

Sd/-  
Mrs. Mensüla  
President

Sd/-  
Mrs. K Asangla  
Secretary

## OFFICE OF THE LANGPANGKONG KAKETSHIR MUNG DANG

Langpangkong Students' Conference

H.Q. Chuchuyimlang - 798614.

Dist. Mokokchung : Nagaland

Ref. No. LKM/GS/YIM-01/2021

Date : 19/09/2021

### Yimyim Ayimoktsür

Tuli Town nung koba Sept. 12th 2021 anogo nisung kari linük tenzük tenüng amer rakzükraitem mapa inyakba asoshi Tuli Town Ward Yimden-i mapang shitak nung aibelenertem pua tapet temerenshi inyakogo, Langpangkong Kaketshir Mungdang-i ner tasü tait mapa tajung asoshi tenüngsang tulu agütsür.

Tarutsü anogotem nung yamala lokti menentsüba mapa (anti social activities) Langpangkong lushi nung kari danga inyakra, Langpangkong Kaketshir Mungdang-i tenük zünga repanga atatsü aser tapet temerenshi agütsutsu ta ayimoktsür.

Sd/-  
( Washimong Sadem  
Longkumer )  
Tir, LKM

( Temjentoshi Jamir )  
Tongti Zulur, LKM

## Phek nung workshop sentong agiogo

**Phek, Rongjui/September 19, 2021 (TYO):** Brehostibarnü (16.09.2021) Phek yimtsüng nung Development Association of Nagaland-i 'half yearly review & synergy development workshop' ka ayonga agiogo. Tanurtem shisaliok angazükdaksütsü temeden aser merenshia/tim masüba maparen ajak nungi tanurtem kümzuka ayutsü nükjidong yur iba tentet (Development Association of Nagaland) yagi inyaker. Phek yimtsüng kübok panchayat hall nung iba sentong agia liasü, ta sangdong ajanga metedaktsü.

Iba sentong nung shisalen sayurji District Child Protection Officer, Phek, Ketobu Vitsu liasü. Vitsu-i, timtem nung alir tanurtem kümzuka aser anepalutsü onük nung jembia aser Village Level Child Protection Committee (VLCPC) indang inyakyimtem telok dang metedaktsü.

Child Welfare Committee

(CWC) den amalitepa inyaktsü asoshi pai züngsemtem ajungshiogo. Sensaker mesüra tangar memenebpa kibong nungi tanurtem atema scheme aser senotsü lenmang balala anguba indang metedakja liasü.

Iba dak sendakba nung, pai, ochimashi maparen nung adenerem indang inyakyimtem rasa ashi aser temsüa alir tanurtem nem tajangzüktem abensaa agütsütsü asoshi telok ayongzük.

Probation officer SCPS, Ayang-i, "Children in conflict with law" onük nung ajemdaker jembia liasü.

Iba workshop sentong tetenzüklen, APM Avino Merlin Zao-i iba tentet aser project indang tongmelang agi rasa ashi. Iba sentong nung Phek village council, secretary, Vepichu menden liasü aser VCC Kuzhonecho-i tepela anküp o jembia. Iba sentong nung nisung 56 shi denogo, ta kasa sangdong nung shia lir.

## Mhainamsti yimtsüng nung Swachhata Shramdaan ayongzük

**Peren, Rongjui/September 19, 2021 (TYO):** India nüjiso ngur küm 75 ajungba (Azadi Ka Amrit Mahotsav) benjongmung nungtem nung, District Water and Sanitation Mission (DWSM), PHED, Peren-i, Hokolbarnü Jalukie Block, Peren kübok Mhainamsti yimtsüng aser highway lenmang nung 'Swachhata Shramdaan' ayonga agiogo, ta sangdong ajanga metedaktsü.

Swachhata Shramdaan sentong nung yimtsüng nungi

temolungertem, watsan committee, village councils, women leaders aser lanur tentetemi shilem agiogo. Yimertem dang Single Use Plastic (SUP) ajanga tzü mopung menentsüba indang metedaktsü aser yimtsüng nung SUP amshiba nokdangtsü ajungshia liasü.

Plastic melena, sü agi yangluba yangkhutem amshitsü asoshi department-i yimertem ajungshiogo, ta kasa sangdong nung shia lir.

# Vinoo Mankad Trophy atema Nagaland team sangdongogo



**Dimapur, Rongjui/ September 19 (TYO):** Nagaland Cricket Association-i, Vinoo Mankad Trophy 2021-22 atema Mens U-19 Cricket Team list sangdongogo.

Iba asayamung nung asaya ajak Ranchi nung asayatsü aser Livescore update @BCCI.TV nung angutsü, ta NCA Hon. Secretary Hyunilo Anilo Khing-i sangdong ka ajanga metetdaksü.

Team nung asayartem yamai alitsü:

Khrievitso Kense (captain), Yugandhar Singh (vice captain),

Odilemba Kichu, Neizekho Rupreo, Keduowhetuo, Mhalevor Dzeyie, Thejavituo Kire, Nripen Rai, Mughavi Sumi, Kelhousilie Zaputou, Sujal

Prasad, Raja Swarnkar, Samuel Zaputou, Bamtibe Npanme, Hito K Assumi, Suzoto Shijoh, Randanbemo Odyuo, Thekasilie Savino, Lalkishan Thakur.

**Support Staff:**

Venecu Nyekha (Team manager)  
Abhijit Chatterjee (Team coach)  
Kinchit Nagar (Team S & C Coach)  
Moalong Kichu (Team Physio)

Asaya mapanglem:

28-09-2021: Nagaland vs Manipur  
29-09-2021: Nagaland vs Meghalaya  
01-10-2021: Nagaland vs Sikkim  
02-10-2021: Nagaland vs Mizoram  
04-10-2021: Nagaland vs Arunachal Pradesh.

# BCCI-i Junior Selection team sangdongogo

**New Delhi, Rongjui/ September 19 (Agencies):** Hokolbarnü, Board of Control for Cricket in India (BCCI)-i All-India Junior Selection Committee nung züngsem pungo shimba sangdongogo.

Iba committee nung Sharath Sridharan (South Zone) tekolak asütsü. Tanünga züngsem rongnung Pathik Patel (West Zone), Ranadeb Bose (East Zone), Kishan Mohan (North Zone) aser Harvinder Singh Sodhi (Central Zone) denasema lir.

Sharath, shibai Assam atema-a asayaogo aser Tamil Nadu State atema Ranji Trophy asaya 100 nung shilem agir Tamil Nadu nung cricket

asayar rongnung pa mezüngbuba lir. Küm 15 cricket asayaba mapang asaya 139 nung pai hundred' 27 yanglu aser average 51 dak tema nung pai run 8700 yanglutet.

India nungi cricket asayar tejen talisa Rahul Dravid, VVS Laxman aser Sourav Ganguly nung cricket asayaba mapang, Test asayamung nung mezüng shilem agitsü maongka tajung ka magitet ta bilemer.

Madhya Pradesh nungi medium-fast bowling all-rounder Harvinder Singh Sodhi-i asaya 76 nung shilem agiogo aser pai run 2000 dak tema yangluba den wicket 174 agiogo. Iba dak alai Harvinder-i BCCI match referee inyaka

liasü. Punjab tenüng nungi Krishnan Mohan-i 1987 nungi 1995 küm tsünga all-rounder ka ama asaya 45 nung shilem agiogo. Ranadeb Bose, shibai 2007 küm England series nung India team nungi shilem agia liasü, pai first class game 91 asayaogo aser wicket 317 agiogo.


All-India Junior Selection Committee nung taoba züngsem rongnung tekolakji Ashish Kapoor (South) aser pa den tanga züngsemtem Debasish Mohanty (East, tang senior selector), Gyanendra Pandey (central), Rakesh Parikh (west) aser Amit Sharma (north) nung liasü.

# New Zealand asayartem dak tai tetongloksü: McClenaghan

**Rongjui/September 19, 2021 (Agencies):** Pakistan nung asayamung athiba atema New Zealand asayartem dak tai tetongloksütsüla, kechiyong parnok sorkar tetuyuba sülen anidaker dang," ta Kiwi pacer Mitchell McClenaghan-i ashi.

Honibarnü New Zealand team Pakistan toktsür mao tsünga batsman Mohammed Hafeez-i anemsü agi tweet asüba dak sedakba nung arishi küm 35 tain asayar yagi telangzüba agüja liasü.

"Asayartem mesera asayamung ayongertem dak tai tetongloksü saka ozü sorkar dak tai tonglokjang. Tetuyuba agütsüba ama dang parnoki inyak. Item asayartem yagibo



asayanüa liasü ta ni meteta lir, ajisüaka parnok asoshi tanga lenmang mali," ta McClenaghan-i tweet asü.

Security dak sendakba nung lendong lir ta shia Pakistan nung asayamung thitsüba sülen

Honibarnü Hafeez-i, New Zealand Cricket (NZC) aija liasü.

"BLACKCAPS pur kecha tetsükdaksü makai airport tonga anir otsüba atema pakistan forces, secutity dang kanga pelar. Kasa lenmang kasa security dang süaka tanübo kecha lendong majuru," ta Hafeez-i tweet asü.

New Zealand team September 11 nü Pakistan-i ODI asem aser T20 Internationals pongu asayatsü aru. Ajisüaka New Zealand Cricket (NZC)-i Hokolbarnü iba asayamung athitsü atema telemtetba agia liasü. Security dak sendakba nung lendong lir ta shia iba asayamung thitsü.

# Arishi küm 16 tekübok purtem Sharjah stadium-i maidaksütsü

**New Delhi, Rongjui/ September 19 (Agencies):** Board of Control for Cricket in India (BCCI)-i 14buba Indian Premier League (IPL) tanabuba shilem reprangtsü atema fan tem nem temelaba agütsüogo, ajisüaka Covid-19 wara temulungdang yur Dubai, Abu Dhabi aser Sharjah nung asayaba mapang tetuyuba kar sülen anidaksü nungdaker.

Tetuyuba kübok Dubai International Cricket Stadium nung asaya reprangi aoertem ghonda 48 tsünga agiba PCR test sayutsü menügdaker saka Covid-19 vaccine agiba kuli sayutsüla. Fan temi mapang ajak nung tetsünga ita inyaksangshitsüla aser mask asemtsü nungdaker. Arishi küm 12 tekübokpur dang covid vaccine agiba kuli sayutsü nungdak mali.

Ano fan tem dang gate nung scanning asüba mapang teyari agütsütsü atema ticket tem mobile nung download asütsü metetdaksüogo.

Kasa mapang nung Sharjah

nungbo arishi küm 16 tempur dang Sharjah Cricket Stadium-i aitsü melatsü. Kasa mapang nung fan temi vaccine agiba kuli sayutsüla aser stadium-i maru tsünga ghonda 48 tsünga agiba PCR test-a sayutsü nungdaker.

Maneni Abu Dhabi kübok Sheikh Zayed Stadium nung arishi küm 16 tempurtemi vaccine agiba kuli sayutsüla aser ghonda 48 tsünga agiba PCR test results dena sayutsü nungdaker. Arishi küm 12 nungi 15 tsünga alirtem ket nungi vaccine agiba kuli memeshitsü saka PCR test agiba report bo meshitsü.

Arishi küm 12 tekübok purtem arishi küm 21 tempur kati meiner arutsüla. Asaya reprangertemi mapang ajak nung tetsünga inyaksangshitsüla aser mask asemtsüla. Asayamung ayongertemi temperature dena tendangtsü aser tongbanga fan ka stadium gate adena tugura tanaben aittsü memelatsü.

# KTC football referee clinic Sept 28 nungi tenzüksü



referees / match officials tem nem physical aser mental fitness dak sendakba nung tengazükba ta sen agütsütsü nükjidong nung ayongzük, ajita asünung dang state nung referee temi taruba football

**Kohima, Rongjui/ September 19 (TYO):** Kohima Town Club (KTC)-i achaayanga September 28 nungi October 2 nü tashi I.G Stadium, Kohima nung Football Referee Clinic ka agitsü. Iba clinic ka AIFF Football Referee Instructor Joy Chandra Singh tawabangba kübok agitsü.

Club sangdong ka ajanga ashiba agi, alima ajunga nung COVID-19 wara pokteter aliba ajanga temang arakzüa inyaksangshiba maparen aser talisa saisapongtem anena lir aser tang sorkari tenokdangba agütsür alibatem salatsüba sülen club-i asaya jenjang ajungkettsü atema football referee clinic ka ayongzüka agitsü telemtetba agiogo.

Maneni iba clinic ya AIFF Instructor anir arua football

asayamungtem temulung lema achaayangtetsü, ta kasa sangdong ajanga metetdaksü.

Iba dak sendakba nung club-i tejangrartem ajak clinic nung shilem agitsü jaokogo, koba "for the community: for the game" omen nung ajemdaker agitsü. Clinic nung shilem agitsü atema tenüng züngoksemtsü asoshi Sports Paradise, Rüluo Market, Keziekie, Kohima semdangtetsü. Maneni osang tejangjaba agitsü atema mobile number; 9612015062, 9856773620 nung tongteprateptetsü.

Kasa mapang nung September 14 nü senden ka amenba mapang, wara pokteter aliba ajanga club-i taküm KFL ayongzüka masayatsü aser taruba kümang asayatsü telemtetba agiogo.

## BILEMDANGANG

"Meteta alirtemi mejembir; jembirtemi meteta mali."